

(Intervju) Anita Šunjić: Poraz je ako proživim ovaj život i ne ostavim ništa iza sebe kao trag da sam jednom ovdje disala

Objavio **Trafika Ba** - Ponedjeljak, Maj 13, 2019



Mostarska kantautorka Anita Šunjić svoju emociju i ljubav prenosi na papir iz koje nastane pjesma koja nikoga ne ostavlja ravnodušnim. Nakon uspješno predstavljenog singla "Sretna na dan", vrijeme je za novu pjesmu "Utjeha" koja će uskoro da dočeka svoj zlatni put do srca slušatelja.

U razgovoru za Trafika.ba, Anita nam je otkrila ko joj je muzički uzor, gdje pronalazi inspiraciju, ali i u kojem pravcu želi da razvije svoju karijeru.

- **Prošle godine ste predstavili singl Sretna na dan, s obzirom da ste Vi radili tekst i muziku možete li nam malo više reći šta se zapravo krije iza pjesme?**

Pjesme koje pišem su inače najbolja slika stanja u kojem se nalazim u nekom trenutku. Moja najveća inspiracija je ljubav i milion pitanja koje se vežu tih emocija. Imam potrebu da sve što osjetim kažem kombinacijom melodije i teksta te da ta kombinacija bude što direktnija. Iskrenost je nešto čega se držim i kao čovjek i kao autor. „Sretna na dan“ je nastala otprilike prije 2 godine, u trenutku slabosti, shvatanja i prihvatanja. Pjesme govori o neuzvraćenoj ljubavi i unutrašnjoj borbi: da li ostati u takvoj emociji i plakati, ili je ipak bolje osloboditi se toga, jer sam samo sretna kad se vidimo – dvaput godišnje. Naslov je samo igra riječima, jer je pjesma u suštini tužna.

- **Gdje pronalazite inspiraciju za pisanje pjesama?**

Inspiraciju pronalazim u svojim emocijama, previranjima, u trenucima koji me ponesu visoko, ili u uspomenama koje su me oblikovale. Zaljubljuje sam prirode pa je to nekako uvijek bilo iscrpno. Nostalgicar sam i kolektor uspomena koje često volim ponovo proživjeti te ih stoga čitav život spremam po ćoškovima stana. Također, empaticar sam i mogu proživjeti i tuđu priču te je prenijeti na papir kao da se desila i meni.

- **Pišete li pjesme za druge?**

Dugo vremena imala sam problem sa nedostatkom samopouzdanja i velikom količinom samokritičnosti. Nisam vjerovala da su moje pjesme toliko dobre da bi ih neko drugi želio izvoditi, ili kupiti. I dan danas takvo mišljenje nosim, ali to me uvijek vodilo da budem bolja verzija sebe. Nakon nekog vremena i prvih izdavanja desilo se da su me kolege počele pitati za pisanje i prodaju, međutim postoji jedan jači razlog: osjećala sam se kao da prodajem dio sebe. Dok pišem i radim aranžman oplaćem više puta. Nisam sebična, ali kad bih čula svoju pjesmu u tuđoj izvedbi, s tom emocijom koja me iscrpila, osjećala bih se kao da sam izdala tu ljubav.

- **Kada publika može da očekuje Vaš novi singl?**

Idući singl je odavno snimljen i spreman, ali nisam realizirala spot i to je jedini razlog zašto pjesma čeka svoj dan. Riječ je o pjesmi „Utjeha“, koja je totalno drugačija od ostalih. Od svih mojih uradaka ima najkraći tekst, ali će najviše reći. Trenutno spremam plan oko promocije i mnogo sam nestrpljiva. Već sam se nekoliko puta prekinula u želji da samo izdam singl bez ikakve pripreme. Smatram da ova pjesma to ne zaslužuje.

- **Da li postoji pjesma nekog drugog autora za koju biste voljeli da je Vaša, da ste je Vi otpjevali?**

Redovno se na sceni pojavi neka pjesma koja me toliko pogodi i oplemeni da je tijekom slušanja prisvojim. Dešavao se komentar: „Da si barem došla meni kao ideja.“ Jedna od tih pjesama je „Grijež“ koju izvodi Natali Dizdar, autor Dino Šaran. Također pjesma od benda Belfast Food – Da si tu. Žao mi je što će se sigurno desiti to da ću se sutra sjetiti neke druge posebne pjesme. Inače godinama pratim one male informacije ispod naslova pjesme: autor teksta, melodije i aranžmana. Tako sam inače došla na želju da se želim bavim aranžiranjem.

- **Kada uskoro i gdje nastupate?**

Nastupe inače dijelim na 2 grane: kao autor i kao izvođač poznatih djela. Što se tiče autorske karijere, idući nastup je u pripremi i to će biti promocija singla „Utjeha“ do kraja godine. Nastupe redovno organiziram u svom gradu Mostaru te u gradovima u blizini, a velika želja mi je nakon te promocije krenuti s pripremom koncerta na kojima ću izvesti sve napisane pjesme tijekom svih godina.

- **Najsretniji trenutak u muzičkoj karijeri? Na koje svoje postignuće ste najponosniji?**

Prije par godina bila sam dio benda Venus u kojem sam već počela pisati pjesme i najviše sam ponosna na ulaz u finale prvog Demofesta u Banja Luci od 200 prijavljenih bendova s pjesmom „Možda“ koja će se naći na albumu „Pričati o ljubavi“.

- **Da li ste odrastajući imali svog muzičkog uzora, ko je to bio?**

Uvijek sam imala uzore koji su oblikovali moj muzički izričaj, a podijelila sam to na 2 strane: internacionalni i regionalni uzor. Uvijek sam voljela pop muziku, ali to je uvijek bila neka kombinacija popa s drugim stilom: pop rock, country pop, celtic pop. Moj regionalni uzor bio je Toše Proeski, od kojeg sam pokušala naučiti sve vokalne tehnike. Omiljeni bend je The Corrs i to se itekako osjeti u mojim melodijama. A kad pričamo o countryju to je jedna i jedina Shania Twain.

- **U kojem pravcu želite dalje da razvijate svoju karijeru?**

Ove godine odlučila sam promijeniti način predstavljanja svojih pjesama. S velikim entuzijazmom i planovima pozvala sam troje talentiranih ljudi na razgovor i oformio se bend koji čine: Lubna Ćurić, Samir Tojaga, Amina Kreso i moja malenkost. Trenutno radim na aranžmanima svih pjesama za budući rad te nestrpljivo čekam dan kad ćemo predstaviti ovu malu kreaciju punu rada i čiste duše. Promocija „Utjehe“ će biti i predstavljanje benda, te najava za album „Pričati o ljubavi“ koji će predstaviti 9 novih pjesama.

- **Citat kojim se vodite kroz život?**

Kroz svoje odrastanje te i danas uvijek sam se vodila mišlju da onaj ko radi, kad tad mora vidjeti rezultat koji želi. Nema mjesta za odustajanje, ali uspjeh nije ono nešto veliko za čim žudimo, nego svaki mali korak koji napravimo do tog sna. Također, držim se iskrenosti i te potrebe da drugima uljepšam dan, trenutak, život. Nema ljepšeg osjećaja nego kad ti neko iz okoline kaže da si mu inspiracija ili uzor, da mu znači tvoja pjesma. Smatram da je poraz ako proživim ovaj život tako da ne ostavim ništa iza sebe kao trag da sam jednom ovdje disala, pisala.

Razgovarala: Adna Tatarević

TRAFIKA.ba